



Lalu Yadav-i par jabaso Tej Pratap RJD nungi mintok

French Open: Sabelenka tanabuba round-i iogo

India nung nisung aika dak COVID-19 puteter

New Delhi, May 25, 2025

(Agencies): India kübok state aika nung COVID-19 kanga puteta arudar aser Deobarnü Maharashtra kübok Thane nung nisung ka asü. Külen, Bengaluru nunga arishi küm 84 tain ka dak COVID putetba sülen asü.

Health ketdangsürtemi kümdanga alitsü shiogo saka parnokisa nübortem dang petsaprong masütsü metetdaksüogo. Union Health Ministry-i tensa kanga junga asadanga reprangdar aser sendentem menogo.

Thane nung arishi küm 21 dak Covid-19 puteter Chhatrapati Shivaji Maharaj Kalwa Hospital nung anepalua aru aser pa tanü asü ta Thane Municipal Corporation-i metetdaksü.

Tan hopta tsüngda Greater Mumbai nung Covid puteter anepalua arur nisung pezübuba süogo.

"Par pezü dak tashidak tulutem keta liasü aser parnok dak Covid putet ta doctor kati ashi.

Tesüiba anogo 10 tsüngda India kübok state aika nung Covid-19 kanga puteta arur, saka private aser public sectors

nung doctor temi shiranger teimba ka dak Covid-19 tashidak tera dang aliba shiogo.

Bengaluru nung arishi küm 84 tain tambur ka temang nung tashidak tulu keta aliba asü aser pa indang COVID-19 test results positive puteta liasü ta Karnataka health department-ia ashi.

Karnataka nunga nisung 38 dak COVID-19 puteta lir aser parnok rongnung 32 tashi Bengaluru nung lir ta health department-isa ashi.

Karnataka aser Delhi dena state aikati nübortem dang petsaprong masütsü advisories sangdongogo.

"Tang tashi nung tensa azüoka lir. Covid-19 terara puteter aser tang onoki iba tashidak agi shirangertem zübazüba dang anepalur" ta Indraprastha Apollo Hospital nung Senior Consultant in Internal Medicine Dr Suranjit Chatterjee-i ashi.

Honibarnü Union Health Secretary Punya Salila Srivastava-i COVID-19 atema senden ka ayonga menogo.

Kerala, Tamil Nadu, Maharashtra, Karnataka amala state tem nung COVID-19 putetba nung ajemdaker iba senden ayonga amen.

PM Modi-i o mashii mejembitsü tuyur

New Delhi, May 25, 2025

(Agencies): Deobarnü Delhi nung National Democratic Alliance (NDA) lennirtem senden amendang Prime Minister Narendra Modi-i yimjak nung o mashii mejembitsü shiogo.

Iba senden ya Good Governance nung temulung agüja amen aser NDA sorkar aliba state tem nungi Chief Minister aser Deputy Chief Minister tem aden.

"Party lennirtemi nüngdak maliba olen jembiba atema tebilemtsü abener. Nenoki o mashii mejembitsüla aser o mejembitsü merangang" ta Prime Minister Modi-i senden nung adenertem dang ashi.

Madhya Pradesh aser Haryana nungi BJP lennirtemi ashishitep aketba olentem jembiba ajanga BJP nüma metangtetsüsa tensa bentsür aruba sülen PM Modi-i iba tetuyuba agütsü.

"Operation Sindoor" nung third party shinga maliasü. Pakistan-i mepishiba sülen ceasefire alitsü telemtetba agi ta

Modi-i senden nung jangjashitsü.

Tawa tu BJP lennir kari Operation Sindoor aser Army atema ashishitep aketba olentem jembiba ajanga party asoshi tebilemtsü bentsür arutsü.

Madhya Pradesh nungi BJP MLA Vijay Shah-i Colonel Sofia Qureshi mezügmeshia jembi. Operation Sindoor mapang armed forces atema osang abenertem rongnung Colonel Sofia densema liasü.

Kashmir kübok Pahalgam nung April 22 nü kiralongrartemi amakba tayang küpzüksü atema Prime Minister-i Pakistan nung alirtem nungi adianutsür ka yok ta Vijay Shah-i ashi.

Külen, Madhya Pradesh Deputy Chief Minister Jagdish Devda-i armed forces dang Prime Minister Narendra Modi tsüngdang apudaksüla ta jembiba ajanga ashishitep ken o tulu ka adok.

BJP minister temi item olen jembiba ya opposition party temi aitsü. Congress-i item olen ya kangasa tim masü ta ashi aser state ajungalen lungkak aittsü metetdaksü.

Rev.Dr. L.Kari Longchar-i Rev. Kijungluba Life Time Ministerial Award Award agizük



Rev.Dr.L.Kari Longchar-i(abelen) Rev.Kijungluba Life Time Ministerial Award agizükdang tangokba noksa.

Mokokchung, Monupii/May 25

(TYO): Mokokchung yimtak Ao Theological Association 33 Buba Kümsem Inti Mungdang den külemi Monupii 25,2025 nü Temoatsü sentep agidang Rev. Kijungluba Life Time Ministerial Award Tsüngrem tenzüker Tebuti Rev. Dr. L. Kari Longchar nem Ao Theological Association ajanga "Tsüngrem Nisung Tasü Tait Yimjung Yanglur" ta ajatsü tetemsü ta shia iba konang senpet agütsüogo.

Ao Theological Association tenüng nung iba award ketdangser tongti Rev. Dr. Moanungsang ajanga Rev. Dr. L. Kari Longchar taküm lia aruba, pai Tsüngrem tenzüka aser alima nung yimjung kadaksütsü aser lokti raksaa aliba yanglushitsü asoshi alima tesem balala nung senzüa inyakba ajak adenshia alirtem nem tatongi rasaa metetdaksür külen iba award agütsü.

Rev. Dr. L. Kari Longchar-i

COCOMI-i tanü MHA den ajuruteptsü; lungkak aiter tetsür 7 yiru

Imphal, May 25, 2025

(Agencies): Deobarnü Imphal nung sepaitemi timi lungkak aitertem dak tear gas aser mock bombs amshidang tetsür aika yirutsüba aitsür ta Coordinating Committee on Manipur Integrity (COCOMI)-i metetdaksü.

Iba lungkak aitba sentong nung tetsütem aser teintet rogotemia shilem agi aser parnoki Manipur Governor dang yimjak nung tatok meshitsü akhanger.

President's Rule kübok ketdangsürtemi civilians dak tashiyim benshir. Timi lungkak aitertem dak tear gas khaloktsüba aser talisa iba ya tetsürtem dak inyakba magizüker ta COCOMI-i ashi.

Parnoki ibala tashiyim mapa anentsü aser tanü tatalokba jungjunga bushisüngdang asütsü takhangba agütsüogo.

Tensa mesüngjemteti liaka COCOMI-i May 27 nü New Delhi nung Union Ministry of Home Affairs (MHA) den ajuruteptsü.

Convenor Khurajam Athouba Singh-i anir teshimtet telok kati Manipur dak sendakba

tebilemtsü onüktem lemsateptsü.

May 3 nü Khuman Lampak nung Manipur People's Convention mapang bangzüng kar renemba nung sülen COCOMI-i MHA den ajurutepa senden amentsü.

COCOMI-i onük aika benoktsü aliba nung Gwalabi tatalokba densema lir. Governor aser state ketdangsürtemi Meitei nunger bendanga amshir ta COCOMI-i tai tongloksür.

Governor-i Manipur nunger mezügmeshiba atema yimjak nung tatok meshiang ta COCOMI-i takhangba agütsütsü.

COCOMI-isa Chief Secretary, Director General of Police, aser Security Advisor nunger anientsü takhangba agütsütsü. Parnok yagi Manipur tensa tamajungba kümdaksür ta COCOMI-i tai tongloksür.

Ajisüaka COCOMI Women's Front aser Student Front-i Manipur kübok tesem balala nung maneni lungkak aitba sentongtem ayonga agütsü.

Bangdakpurtemi nübortem taginüba ama meinyak tashi lungkak aittsü ta COCOMI-i ashir.

Rev.Kijungluba Life Time Ministerial Award Award agizüker külen mapang tatsüka agia jembidang pai iba award ya pa kijai inyakba agi anguba masü saka ABAM-i teti dang nungita aruba ajanga tanü iba senpet agizüker aser iba den ano pa den yaritepa arur, talisa par putu nung Pastor-tem, tesayurtem, lenirtem, Rev. Kijungluba, Rev. Longri, Rev. Chujang Rev. R.J. Amen, Rev. K. Temjen, Wb.Yangerlemba, Wt. Bendangla, Wb. Limayapang, Rev. Luin, Rev. Lanumeren, Rev. Dr. Noksangla aser Tsüngrem tenzükertemi nungita yaritepba den külemi Ao kini aser Naga nungeri inyakba ajanga angurta kuli agüja ashi.

Paisa pa tasoyim Chungtia yimden aser Arogo-i scholarship agüja züngdaksüba ajanga tanü iba jenjang tongteta par tasoyim yimden aser arogo nem tenüngsang agüja ashi.

Ao kin aser Naga nunger Arogo aser Yimden aser alima asoshi mapatong balala nung tesem balalai oagi mapang shitak nung achi ajem mesüi timtem balala ajurua inyakba kuli balala lemsatepa Rev. Kari-i adenshia alirtem ayongzüka jembi.

Deobarnü COCOMI-i anir tetsür meyrjang aikati lungkak aita Kangla gate tsütsü ao aser Raj Bhavan telungi aitsü merang.

Idangji security forces aser Rapid Action Force (RAF) personnel-i lungkak aitertem senshidaksütsü atema tear gas shells aser smoke bombs khaloktsüdang tetsür 7 yiru.

Ima Keithel nungi lungkak aita jajartemi Kangla Gate anasa iba lendong ajuru.

Ukhrul nungi Manipur journalists telok ka Shirui Lily Festival 2025 nung adentsü aodang Maha Regiment-i parnok amenba MST bus garitem nungi "Manipur" ojang mimbangdaksüba sülen lungkak aitba tenzüka liasü.

COCOMI-i Honibarnü state ajungalen lungkak aittsü tetuyuba agüja liasü aser parnoki timi aser ozüangi melaba ama lungkak aittsü ayongzü.

Maha Regiment-i inyakba ya Manipur maitsü mezügmeshiba lir aser Governor o Presidential Rule (PR) administration-i ola madokba aitsür ta COCOMI-i ashi.

Sorkar mapa masü education nung reservation ali tajungba: MLA Achumbemo



MLA Achumbemo Kikon-i St. Paul Hr. Sec. School Dimapur nungi NBSE HSLC Rank 1 jenjang tongtetla Lungyihangle Nring nem sempet agütsü dang tangokba noksa nung angur.

Dimapur, Monupii/May 25 (TYO): St. Paul Hr. Sec. School Dimapur nungi Lungyihangle Nring-i NBSE HSLC Rank 1 jenjang tongteta marks noklang nung shilem 98.67 ngutetba aser ano HSLC aser HSSLC nung takok tajung angur nem tenünsang agütsüba sentong ka Zeliangrong Students' Union Nagaland ajanga May 24, 2025 nü Jubilee Hall, St. Xavier Parish Church, Jalukie nung ayongzük, kong MLA Achumbemo Kikon sentong akhumdong ama dena liasü.

MLA Achumbemo Kikon-i iba sentong nung jembidang, Zeliang kin nungi toppers tenet aser ano jenjang tajung nung takok angur nem tenünsang agütsü aser ibai nüburtem asoshi tongtipang mapang ka lir, ta pai ashi aser Zeliang kin nungi tesüsa HSLC topper Cherakung Zeliang bilemtet, shibai 1997 küm marks shilem 99 ngua iba jenjang tongteta liasü aser tang Indian Foreign Service nung mapa inyaktar.

Pai Zeliang kin nungi Haipou Jadonang takum otsü tongmelang agi lemsatepa liasü, shiba nüchiso asoshi nokdaker ka liasü aser British nung yimsüsüba anema nokdak dang takum bendanga agütsü aser küm shia August 29 nung Martyr's Day ya amunger.

Maneni pai Naga nung nuclear scientist mezüngbuba Er. Chireuding Zeliang indanga athishia liasü, shiba Zeliang kin nungi lir.

Item nisung temi jenjang balala nung takok anguba athishia pai sentong nung adener dang Zeliang nung wadang balala aser lenisüba nung puti otsü tajung lir ta Kikon-i ashi.

Pai nüburtem dang maneni takok tuluba angutsü asoshi meranga inyaksü aser pei sempet nung temulung alemtsü ayongzuka liasü.

Yamaji takok anguba liaka Zeliang kin ya Backward Tribe ka ama maneni züngshir, ta pai süoki ia bilemba lemsatep.

Zeliang nung iba label ya alema tejakleni aor, kechiaser Naga nung lokti nung danga kin den sako tashi aliba sayuteter, ta pai ashi.

MLA Kikon-i reservation atema system tajungba ka amenok nung ajungtsü, koba kin telemsa nung masü saka socio-economic status aser regional infrastructural development nung ajemdaker lemsatsüla, ta ashi.

Reservation ya tangbo educational sector nem agütsütsüla aser meta talang leni tesayur tajungtem timba yoktsüla aser kaketshir nem shisaliok angazükdaktsütsü asoshi nungdakba technology agütsütsüla, ta pai ashi.

Pai iba ojang ya tatishitsü bener arua rateta ashi, kong nisung ka job reservation nungi tajangzük ngur tantg resources aser maongka ajak agir ta ashi.

Yamala nisung mesüra "creamy layer" ta ajartem ya reservation tajangzük menügdaki kumogo aser

reservation magütsütsüla, aser yamaji inyakba ajanga dang shidakba nung tensa mejungi alirtem nungdakba teyari angutsü, ta pai ashi.

MLA Achumbemo Kikon-i sorkar mapa nung reservation ya educational sector dangi melentsü asoshi ashiba kuli ana agüja liasü.

Mezüngbuba nung, census tasen ka magi tashi tang aliba backward quota ya lepa repringshitsü tasak ta sorkari angatetra, tang aliba backward quota ya sorkari küm ana nungi asem tashi kasa amshitsü latettsüla, ta pai ashi.

Tanabuba nung, küm ana nungi asem tembangba sülen reservation ya yimya balaka nung asütsüla - job reservation ya educational reservation dangi melentsüla.

Aser iba sentong mapa kuma inyaksü asoshi jangjateta aliba tesem/pocket wise nem scholarship agütsütsü akok aser parnok nem iba senji kaketshir tuition balaka agiba aser sorkari lapoka aliba school nung tesayur tali yokba nung amshidaktsütsü.

Yamaji amshira, backward tesem nung aliba nübur aser kaketshir temi memeteti advanced tribes pur menepa akumtsü, mesüra advanced area nung alirtem ajatettsü, ta MLA Kikon-i ashi.

Meta talang nungi timtem balala ajanger HSLC tatidang nung takok anguba kaketshir asem INICIO Foundation ajanga yariba asoshi pai tenünsang agütsü aser iba amala teyari yimya yagi reservation indang tanüla shidakba sayur, ta pai ashi.

MLA Kikon-isa Jalukie aser temeket tesemtem ya state yimtiba Kohima aser commercial hub Dimapur anasa lir, anungji Zeliang nung danga region nung alir dang nungi facility aser maongka tajungba angur ta ashi.

MLA Kikon-isa Zeliangrong sub-tribes - Zeme, Liangmai, Rongmei aser Inpui tem maneni lungjemer kibong ka ama alitsü ayongzük.

Iba telungjem tashi mait kumdaktsütsüsa inyaksangshi masütsüla, kechiaser lungjemer aliba Zeliangrong community ajanga Naga nung terenlok asoshi tongti shilem agir, ta paisa ashi.



Central security forces aser Manipur Police lungjemer Kakching district nung Kakchung PS kübok Angangching Eco Park anasa Kakching Tejpur crossing nung People's Liberation Army züngsem ana den mobile phone asem aser four-wheeler gari ka apuba noksa nung angur.

Computer Courses & NEET/JEE Coaching atema NITI Nagaland-i scholarship agütsür

Dimapur, Monupii/May 25 (TYO): Küm 25 ajungba benjongmung temaitsü NITI Nagaland ajanga Nagaland nungi NBSE & CBSE Board indang Science stream nungi Class X & XII nung 10 Topper Candidates asoshi June 30, 2025 tashi scholarship noklang shilem tashi agütsür.

Ano June 18, 2025 nung adoktsü aliba 25th Annual Day Celebration indang souvenir nung amshitsü atema video mesüra tezüluba nung takum kuli aser articles tem meshir. Articles aser video tajungtiba nem sempet agütsütsü, ta NITI Nagaland sangdong ka ajanga ashi.

Nagaland nung IT aser ITES education tenzüker küm 26 buba nung nüma danga ayaoka aidang, Lords Infotech Management Pvt. Ltd. tawabangba kübok NIIT/NITI Dimapur & Chümoukedima

ajanga kaketshir, alumni, tsürabur, team members, temulunger aser tongtipang nisungtem iba Silver Jubilee benjongmung nung shilem agütsü jaoker, ta sangdong ajanga ashi.

Küm 20 dak tema ozü reju ajanga kaketshir 40,000 dak tema takum melenshija lanur 5,000 dak tema placements balalai yokba nung yari aser region nung entrepreneurs zünger mezüngmai yaria arur.

Onoki IT nung professional excellence aser skill development agütsüba kisüing masü saka social service, scholarships aser cutting-edge technologies nung Nagaland nung aliba lanurtem yarir.

Alizüing tongtetba küm nung NITI Academy indang wadang ulushia doctor aser engineer kumnür lanurtem nem NEET aser JEE (Mains & Advanced) atema coaching agütsür, ta sangdong ajangasa ashi.

Kohima Press Club-i asükhu lemsateper

Dimapur, Monupii/May 25 (TYO): Kohima Press Club nung züngsem Wapangnungsang Pongen asüba osang angashia asükhu lemsateper, ta KPC tir Alice Yhoshü aser tongti zülur Vishü Rita Krocha nati sangdong ka nung ashi.

Pa ya ita shia Ao oshi adokba magazine, Lenjeter nung full-time correspondent ka ama inyaka liasü aser pa tia makai May 24, 2025 nü iba lima nungi pilaba mapang tashi Kohima Press Club nung küm asem dak tema züngsem ka liasü.

Pa dak sasapela, ajemalu yimya tajung liasü, aser Club indang inyakyim nung teti tejangraba tulu nung shilem agia

liasü.

Pa anojungi asüba ajanga onok asoshi külem tenzüker lanur ka samaba kisüing masü saka mapa tajet aser teyakyak züngsem ka samar alitsü aser pa maliba jangja-jangja metettsü, ta sangdong ajanga ashi.

Ozü mulungjang nung pa teti alitsü.

KPC ajanga kinunger tem den asükhu lemsateper. Par kibong den külemi onoki mang ayimer aser Tsüngremi parnok nem tashi aser anisüingzük agüjang ta sarasademtsür.

Pa tanüla teti tatem maka tesunep nung anisüingzükjang ta sarasademtsür, ta KPC sangdong ajangasa ashi.

Manipur police-i nisung ana apu, temesepba mozü den sen 37 lakh ngutet

Imphal, Monupii/May 25 (Agencies): Central security forces teyari nung Manipur police-i ghonda 24 tsüingta temesepba mozü shibelener nisung ana apu, aser parnok ket nungi international market nung sen crore asem jenjang temesepba mozü sapon cases 45 nung sepa aliba den sen 37 lakhs ngutet, ta ketdangsür ajanga Honibarnü ashi.

Ketdangsür temi ashiba agi, Churachandpur district kübok Tanguam yimtsüing nung alir arishi küm 46 tain Chigenvung apuba sülen operation ya tenzüker.

Police temi la ya lar kidang apu aser brown sugar südi ta temulung melemi aliba temesepba mozü tuoziük grams 289 ya sapon cases 25 nung sepa aliba den sen 8 lakhs aser mobile phone ka ngutet, ta police-i ashi.

La dang asüingdangyaba



sülen joint team ajanga Churachandpur district kübok Mongkot Khopi yimtsüing nungi arishi 52 tain Doukholeit Hanghal apu, ta ashi.

Doukholeit Hanghal ket nungu sen 1.74 crores jenjang brown sugar tuoziük 870 grams, No. 4 heroin südi ta temulung melemi aliba temesepba mozü tuoziük 260 grams sapon cases 20 nung sepa aliba aser India nung sen 29.5 lakhs ngutet, ta ketdangsür temi ashi.



Defence Minister Rajnath Singh den Union Home Minister Amit Shah, Union Minister aser BJP National tir JP Nadda aser NDA chief minister tem Ato Kilonser Narendra Modi indang 'Mann ki Baat' sentong nung shilem agiba noksa nung angur.

PM Modi-i Operation Sindoor tenüngsanga jembi

New Delhi, Monupii/May 25 (Agencies): Ita shia agiba radio sentong "Mann Ki Baat" nung jembi mapang Ato Kilonser Narendra Modi-i Deobarnü, Operation Sindoor nung shilem ka ama Indian Armed Forces temi Pakistan aser Pakistan-occupied Kashmir (PoK) nung kiralongrartem tesep raksatsüba noksa lemsatepa liasü.

Modi-i ashiba agi, Operation Sindoor ya military mission ka dang masü, saka iba ya India melenshiba temaisü lir aser iba ajanga linük tamendakdak, tasü aitba aser alima nung tashi taitba küma aoba sayur.

"Operation Sindoor mapang sepaitemi tashi ita raraba ajanga India nunger ajak nema dangdaksüogo. Sepaitemi koda arrtsü adener kanga mezünga

kiralongrartem tesep raksatsüogo, iba ya jangrademsüka lir," ta Modi-i ashi.

"Operation Sindoor ajanga, alima ajunga nung kiralongrartem atema raraba mapang tejangraba tasen agütsüba den tali temulung lemteta kümdaksüogo," ta pai shisem.

Ato Kilonser-isa mission takok asoshi India nung yangluba prangbong injang aser hadir balala amshiba atema tenüngsang agütsü.

"Asen sepaitemi kanga tasü ita aser India nung yangluba prangbong injang, hadir balala aser technology amshia kiralongrartem temendakdak raksatsüogo. Iba takok nung lisopur engineer, technician tem

ken o dak sendaka alir ajak indang asentzü densema lir," ta PM-i ashi.

Modi-isa, armed forces nem tetushi agüja linük kübok yimti, yimtsüng aser jila balala nung Tiranga Yatras ayongzüka agiba atema tenüngsang agütsü.

April 22 nü Kashmir nung Pahalgam tesem maka civilian 22 tepsetba atema telangzüba agüja India-i Operation Sindoor benoka liasü.

Iba mission kübok India-i May 7 nü Pakistan aser Pakistan-occupied Kashmir (PoK) nung kiralongrar tesep teku maka liasü. Iba mapang kiralongrar 100 shi tepsetogo. Iba sülen Pakistan aser India na fighter jet, missile, drone, artillery aser rocket amshia kati ka maktepa laisü.

Myanmar nunger refugee tem züngok-semtsü atema portal ka lapoktsü: Amit Shah

Aizwal, Monupii/May 25 (Agencies): Myanmar nunger refugee tem shirnok tang Mizoram nung jenoka lir, parnok züngoksemtsü atema online portal ka yakta lapoktsütsü ta Union home minister Amit Shah-i tenangzüka agütsüogo, ta Shah aser chief minister Lalduhoma na Honibarnü ajurutebpa sülen Mizoram sorkari ashi.

Mizoram home minister K. Sapdanga-i taoba mapang state assembly nung ashiba agi, ministry of home affairs' indang tang benschia aliba refugee züngoksemba inyakyim nung data bendentsü atema tongtibang capability kar mali. Item tashimaittem ya metongshitsü atema iba system

ya tang lepareprangshidar.

Osang ajanga ashiba agi, Shah-i chief minister Lalduhoma dang portal tasenba nung Myanmar nunger refugee tem maitsü jangjatsü aser tag sütettsü aser iba ajanga kidanger linük nungi nüburtem senoka aitba ajanga tetsükdaksü adokbatem bentettsü tezübaba kümdaksütsü, ta shiogo.

Senden nung Shah-i, yimjung meraksadaksüba atema Mizoram sorkar nem tenüngsang agütsü aser Lalduhoma-i sentong balala benoka inyaka aliba tem asoshi pa nem tenüngsang agütsü. Paisa, yimjung dak sendakba inyakyim ajanga state indang flagship "Bana Kaih" (Handholding Scheme) nongita yaritsü ta ashi.

Kasa mapang nung Lalduhoma-ia, Mizoram-i Indo-Myanmar arrtsü nung Territorial Army unit timba kümtsütsü mepeshiba Saha-i pusemba atema pa dang kanga pelaba lemsatep. State sorkari tawa MLA aser retired Lt. Col. Clement Lalhmingthanga lenisüba nung Mizo Territorial Army Battalion ka amenoktsü atema tesem tapet ka bushitsü asoshi committee ka tentetogo.

Lalhmingthanga-i ashiba agi, Territorial Army kübok company ana anitettsü atema sentong yangludar.

Lalduhoma-isa, ministry dang Lengpui Airport management ya takaratiba nung Airports Authority of India nem agütsütsü mepeshia liasü.



Himachal Pradesh nung Kullu district kübok Jagatkhana nung tzümetsüng aruba sülen lishi nung gari asonger aliba noksa nung angur.

Gujarat nung menden 2 atema by-polls Jun 19 nü agitsü

New Delhi, Monupii/May 25 (Agencies): Gujarat nung Visavadar aser Kadi assembly menden atema by-election June 19 nü agitsü aser result anogo pezü lir sangdongtsü, ta Election Commission of India (ECI)-i Deobarnü metetdaksüogo. Iba election nung ruling Bharatiya Janata Party (BJP) aser Opposition Congress aser Aam Aadmi Party (AAP) nunger tokteptsü.

By-election atema gazette notification ka Hombarnü sangdongtsü. Nomination scrutiny June 3 nü agitsü. Candidate temi June 5 nü tashi nung pei tenüng agintettsü.

AAP MLA Bhupendra Bhayani-i party tokja BJP nung adenba sülen Junagadh district kübok Visavadar menden nung

election agishitsüsa aküm. Pai party toktsüba sülen AAP pur assembly nung menden pezü dang aküm.

Kasa mapang nung MLA Karshanbhai Solanki February ita asüba sülen Mehsana district kübok Kadi (Scheduled Caste) menden tazüng küma liasü.

AAP taoba state tekolakba Gopal Italia Visavadar nungi tokteptsü atema shimogo. Pai aluyimertem atema nokdakba aser ochi mashi inyakyim anema nokdakba dak ajemdaker tokteptsü renemdar.

BJP puri Visavadar menden ya taoba chief minister Keshubhai Patel mapa nungi aziüoka aruogo. Parnoki tang tashi candidate sangdonga mali, saka Bhayani yoktsü imlar.

(Maneni tapak 8 nung...)

Lalu Yadav-i par jabaso Tej Pratap RJD nungi mintok

New Delhi, Monupii/May 25 (Agencies): Lalu Yadav-i Deobarnü par jabaso tambusang Tej Pratap Yadav küm trok atema Rashtriya Janata Dal (RJD) nungi mintokogo aser pa par kibong nungia jentokogo.

Tej Pratap Yadav-i pa indang Facebook page nung tetsür ka den tangokba noksa ka den kü 'partner' ta zülutsür lemsatepba sülen Lalu-i iba jenjang agia liasü.

RJD tekolakba Lalu Yadav-i X ajanga, kü jabso tambusang inyakyim, lokti nung inyaksangshi aser khuret mangateti yimya balala benschiba ya ozü kübok tamendakdak aser sobaliba den meputep, ta ashi.

"Jurila libaliro nung moral values tem sentoka toktsüba ajanga onok ajak longjemer

loktiliba nung ochiba asoshi nokdakba tashi meiti kümdaksür," ta Lalu Yadav-i zülutsü.

"Anungji iba dak ajemdaker ni pa party aser kibong nungi mintoker. Tang nungi pai party aser kibong inyakyim nung shilem magitsü. Pa party nungi küm trok atema mintokogo. Pai pa taküm nung tajung majung bendangtsü koka lir. Pa den sendaktepa alirtem ajaki peisasa telemtetba agitsüla," ta Lalu Yadav-i zülutsü.

Taoba mapang Bihar minister Tej Pratap Yadav-i ashiba agi, pa indang Facebook account ya hake süa liasü. Tej Pratap ya mapang talang ka tetsür ka tenüng agi Anushka Yadav den sendaktepa arudar ta asüba post ka ayimsünga prokshiba sülen pai iba olen lemsatepa liasü.

(Maneni tapak 8 nung...)

LEGAL NOTICE

DEBTS RECOVERY TRIBUNAL GUWAHATI

Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati, 781007 (Assam)

REVIEW APPLICATION NO. NDN/145/2025 (RA)

IN

I.A.76/2025

IN

ORIGINAL APPLICATION NO.445/2016

N HENRY ZELIANG

-Versus-

Canara Bank & Ors

.....Applicant

.....Defendants

To,

1. CANARA BANK

Having its Branch Office at S.O. First Floor, Latika Complex, Nyamo Lotha Road, Dimapur, Nagaland, Pin-797112.

2. Mr. Alo Mero

Son of Lipen Boro, Kevijau Colony, Ward No.16, Dimapur, Nagaland, Pin-797112

3. Shri Yibemokikon

Purana Bazar-b, Airport, Dimapur. PIN:797112

-Defendants

NOTICE

WHEREAS the Applicant has filed a Review Application under Rule 5 A against the Judgment & Order dated-21.06.2024 passed by this Hon'ble Tribunal in ORIGINAL APPLICATION NO.445/2016 along with an application under Section 5 of the Limitation Act for seeking condonation of delay of a period of 190 days in preferring the Review application.

And Whereas the said case was listed before the Hon'ble Presiding Officer on 02/04/2025.

Whereas this Hon'ble Tribunal was pleased to issue Notice on the said Application against you.

You are hereby summoned to appear in this Tribunal in person or by a pleader duly instructed and able to answer all material questions relating to the case, or who shall be accompanied by some person able to answer all such questions on 11.06.2025 at 10.0'Clock in the forenoon to answer the claim, and further you are hereby directed to file on that day a written objection of your defense and to produce on the said day all documents your possession or power upon which you base your defense or claim.

Take notice that, in default of your appearance on the day before mentioned, that the suit will be heard and determined in your absence.

Given under my hand and seal of this, on this the 11th day of May, 2025

Signature of the Officer authorized to issue Summons

Registrar

Debts Recovery Tribunal

Guwahati



TIR YIMYIM YIMOBILEM (EDITORIAL)

DIMAPUR MONDAY, MAY (MONUPII) 26, 2025

Janaona endokyim

Dimapur nung nütüning renlokba ama anogo shia nisungtemi amshiba, achia-ajemba aser mapa inyakbatem nungi janaona teimba-teimba adoker, anungji chiyongtsü bushitsüba dang nungibo asenoki endokba janaonatem bendena timi endoktsübjang mapa tuluba aser tim tatemala kümogo. Aji oda, tang janaona endokba tesem nung ya joko jana endokdak tesem mali kuma süngogo aser iba tesem melena. Dubagoan yimtsüning kübok tesem tasen ka mesemtetsü asoshi mapa tenzüksü anasa Dubagoan yimteni nokdangba ajanga Dimapur nung nung alirtemi janaba janaona endokdak maka kümogo. Ashiko, iba ama tebilemstü ya tanü Nagaland nung Dimapur nung dang masü saka tanga town aser yimtsüngtem nunga alitsüa akok. Atangji, janaona-sa asüyonga akhi mapang endokba janaona o tanü asüning endokba janaona na balala, kechiyong akhidangbo plastic agi yangluba osettsütem kangabo mali asü aser electronic osettem agi janaona kuma amshitsüsabo masü asü. Aji oda, akhidang asenoki endokba janaonatemji teimbaka khen nung ali kuma aotsüba osettem kaket aser süngolio aser süngtang süngratem dang liasü saka tanü asüngbo asenoki endokba janaonatemji kaket aser süngoliotem dang nungibo polythene mesüra plastic agi yangluba osettem kanga agia teimba bendener. Item melamelaa ali kuma maotsüba janaona osettemji kodang asenoki mashimashi nung endokdir, item jagi alijak nung süngdonglidonga jungjunga memeitsüsa nembanger aser ayong aser tüzim telong ajak plastic osettem jagi asünger, anungji tzu nung taküm alibatema melitetsüsa akümer. Item timtem aser takoksatemji dang masü saka asenok aikati plastic janaonatem bendena aronger aser karibo ali tur aremer, ajisuaka item jagi asenoki memeteti asenok nem timtem agütsütsüsa tzu mopong aser ali telong menendaktsür. Ano, asenok asoshi lendong kaji tanü asüngbo janaona ya kidang nungi aluba janaonatem dangbo mapa inyakdak industry, factory aser mozü kitem nungi aluba janaonatem teimba alur aser itemjibo mozü tzu, chemical, adenba janaonatem teimba asür, anungji itemji tesem mashi nung endokra, item jagi asenok nem lenmang aisü nungi timtem agütsütsü koka lir. Ashiko, asen lima nungbo asenoki janaona mashi endokba ajanga timtem ajuruba indang kangabo süoki ia mebilemi alitsüa akok, anungji kidang janabatem dang masü saka mozü kidang bendenba janaona aser factory nungi aluba janaonatem ajak bendena anogo shia yimkong jajadak 'Highway' lenküpbok mashi ka nung endoka alitsüa akok. Ano, asenok dak tang tashi mashimalu kaji, asenoki janaona endoktsü atema kilentzü mesüra ayonga bushia endoker. Iba jagi kilentzü nung motzü moutet lenmang raksar aser ayong nung taküm sangnu melitetsüsa tzu menendaktsür. Item ajakji rajema meteta inyaktsü asoshi tanü asüngbo yimti nung janaona endokba inyakyim, Waste Maganement, indang ozüning kuma lateta lir aser janaona mashi nung marongtsü, maremtsü aser meindoktsü atema Center aser State shia nung Pollution Control Board tenteta repranger aser yimtitem nung janaona endokba ajanga tzu mopong aser ali memenentsü asoshi Environment Protection Act 1986 aser Solid Waste Management Act 2016 lateta lir. Item ozüngtem jagi janaona koma bendena kong aser koma endoktsü item ajakji lateta yuja lir. Atangji, tajung kaji tanü putu yabo janaona agi tagitsü, Waste to Wealth, yanglutetba putu lir, anungji kaket aser plastic osettem bendenba janaonatemji tanaben menüngsar tagitsü oset yanglur. Ano, aji dang masü saka janaona arongba nungia electric power adokdakja tagitsü mapa inyakteter. Kasaji, melamelaa ali kuma osettsüba janaonatem menünga ali temo yanglua agiteter. Itemji meteta kodang inyakdir, janaona bendena endoktsübjagi tebilemstü masü temoatsü akümer. Aji oda, kidang nungi tenzüka janaona tapu balala bentetbenteta tesem balala nung bendentsü aser janaona bendena endoktsüba inyakyimtema ozüning nung lateta aliba ama inyaktsü atema tamasa yimten tashi, maongka aser khuret bena alirtemi nübortem nem tangatetba tajung agütsütsübjagi mezüning tongtibang teinyaktsü asütsü.

OLEMSABANG

Sorkar-i nübur atema agütsüba shitak ketdangsüa amshitsüla

~ L.Kika Pongener.

Asen Naga nung ya noklang shilem nung tokür-tuko (99 %) center sorkar dak metaloker alir. Asen Naga nung nem center sorkar-i terenlok mapa inyaktsü asoshi senotsü agütsüba agi terenlok mapa shitak inyak nungpo asen lima nung lenmang ajak ya sentsüpranga menokbanger alitsüba. Jila aser yimtsüning ajak nung tzu agi iba amai timmedemi peria dang ajemtsü aser Electric light tesangwa agi iba amai timtema meli-i peria dang atsüktsü. Asen Naga nung VIP-tem nungi shir alua talakba hajira-walla tashi Gari (Vehicle) makarbo kibong ka danga malitsü sudi. Aser ano sen lakh aika jenjang Gari (Luxury Car/Branded Car) nung mener senzür-a aikasa lir. Ajisuaka, asen lima nung lenmangpo ayong den kecha tepila mali tarok-tapa paitokera mepaitokmai jokshi-shia senzüteper aser aoyi/lishi agi Gari tobur tajung ajak-to tobur kanga mejungi tesempatsüka pongbanger/menener. Anungji iba tia jenjangji shisadanga....Coat suit & nectie tik-tak tobur junga subor Khaki Halfpant tejen tapok ka asemba dang mesuker asütsü....!!! Tetezü.... Lenmang condition den Gari (Car) jenjang khenyongi meputep. Aji oda, kecha manganutsü mali, sorkar Department nung ketdangsertem-ia sen shitak ketdangsua mamshir asütsü akok, ano contractor-tem aser dekhadar-temia sen agütsüba amai mapa shitak meinyaker asütsü akok, aser telok balalai percentage (%) saru-saji onsara meshiba agi terenlok mapa shitak meinyaktetsüsa tetsükdaktsü aika ajurua alitsü akok. Ibajagi Drum/Bucket tapok nung tzu shioktsüba amai ajak tezüleni senzüka oadoker. Ibajagi tapu aika jembiyongjia sen sanction anguba ama terenlok mapaji shitak meinyakteter. Anungji sen sanction anguba ama terenlok mapa shitak meinyaktetbaji sorkar ketdangser dang tai masü "Mesu tongpang jakrep" otsü amato nütüning-nübura dena ajak tai asütsü.

Yimtsüning nung alir sensaker (Below Poverty Level) nung alirtem, hajira oa aayangtsü aser yimtsüning nung terenlok mapa-a inyaktsü atema Centre sorkar-i "Mahatma Gandhi National Rural Employment Guarantee Act" (MGNREGA) Fund nungi Job Card ajanga senotsü teyari agütsür. Iba sen ya tamale-bo yimtsüning shia Village Development Board (VDB) account ajanga yoka liasü sudi.... Saka küm ka-ana shi tejaklen nungi 'Job Card holder'-tem Bank account ajanga yoker. Ajisuaka, iba sen ya Job Card Holder-tem pei nuja meyong subsidy/relief/allowance kar agütsüba sen amai mangatetsüla. Iba sen ya yimtsüning terenlok mapa inyaktsü nungdem nung agütsüba sen, aser iba mapa inyakdangji Job Card Holder shiba sudir pa/la-a mapa inyaka Hajira (Wages) agidaktsütsü....ta iba nungdem nungji agütsüba sen lir. Anungji iba senji Village Council aser Village Development Board (VDB)-i Job Card Holder-tem dang nungi meshia bendenbaji tim dang inyaker. Kechiyong iba sen ya yimtsüning shia Village Council & VDB ajanga Plan/Project/Scheme renemer Concern Department office dangi yoker aser iba Plan/Project/Scheme-ji approved sur iba mapaji inyaktsüba nungdem nung yokba sen lir. Iba Fund ajanga approach roads, sector roads, culprits, retaining wall, community well, community fishery pond, drainage, foot-path & steps, repair & renovation works etc. yamala mapatem inyaker. Anungji iba sen ya yimer ajak (Public) arok meyong sen ta nübur ajaki angatetsüla. Anungji Village Council Members & Village Development Board (VDB)-i anir nütüning-nübura ajaki iba sen ya amajok nung meintoki, sorkar nukjidong shitak atalokdakja, yimtsüning terenlok mapa nung shidak amshia inyaktsüla..... Aser Job Card Holder-tem nema Hajira/taa (wages) shidak agütsütsüla.

Ano sorkar-i Below Poverty Level (BPL) nung alirtem nem PHH aser AAY Ration Card ajanga jang (Rice) jenjang dalang agi aser angadi agi agütsür. Anungji Fair Price Shop kibur ajaki sorkar nukjidong atalokdakja ochishia ketdangsua amshitsüla. Ajisuaka, kanga tesasatsüka, iba Ration Card jang agütsüba nungjia Fair Price Shop kar nungpo jang seret pongu (5 kgs) tashi Gari para nungdem nung Fair Price Shop kiburtemi katizüka yur agütsüba nüburttemi nungsen jembiba otsü/osang angazüker. Anungji nüburttemi jembiba amaji shitak inyaka lira ajibo kangasa aibelena inyakba mapa ka asütsü. Aji oda, sorkar-i jang abenba para (Carrying charge) temenok shitak agüja alitsü akok, anungji Gari para nungdem nung jang (Rice) katizüka ayutsü menungdaker. Ano Ration Card ajanga jang (Rice) dang masü mapang kar-kar nungpo Dal, Sugar, K. Oil....itemjia agütsür. Anungji item ajakji Fair Price Shop kiburtemi jenjang (Price) talila metui sorkar-i agütsüba jenjang shitak agi agütsütsüla aser touzük shitak agütsütsüla. Ano Ration Card Holder/beneficiary-temia pei tangutsü tim shitak manguba atema-bo ola adoktsüla....Saka pei tangutsü tim shitak anguba-bo jang (Rice) dang masü tanga-jia kechi ngudir ajak agizüktsüla. Kechiyong ibaji Ration Card nungdem nung agütsüba Ration Card Holder meyong lir. Anungji pei tangutsü tim angubajibo menungnangi shitakji agizüktsüla. Aser Ration Card nung tangutsü tim ajak shitak angur asü mangur (?) Shitak agütsür asü magütsür (?)....ta nüburttemi tenuk yoka reprangtsüla aser tim masü inyakba kar putetra tasü-ita ola adoktsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Kyrgyzstan nung pastor ka merenshia amshir tepuokdak ayu



Birinchî May (Pervomaisky) District Court, Bishkek, Kyrgyzstan nung April 17, 2025 nü Rev. Pavel Shreider anema ken o jembi tenzükdang tangokba noksa ka yangi angur.

Bishkek, Monupii/May 25 (Agencies): Kyrgyzstan nung tsükchitep adokdaksür ta tai tonglokja temetet tepuokdak ayutsü südi ta alisang pastor ya apuba sülen iron pipe agi azük, metsü aser tekolak aser teku nunga teka agi atsüng, ta rights group Forum 18 ajanga ashi.

True and Free Reform Seventh-day Adventist Church nung arishi küm 65 tain pastor, Rev. Pavel Shreider yagi tiazü nangzükdaktsütsü meranga merenshia amshi aser Kyrgyzstan yimtiba Bishkek nung aliba Interior Ministry Investigation Prison nung pre-trial detention nung tepuokdak yua lir, ta Forum 18 ajanga ashi.

Pa ya November 13 anepdang 8:00 ako meta Bishkek anasa par kidang nungi ayazüka aludang National Security Service (NSC) police temi handcuffed asüba sülen yangji alir. Item miim sepaitemi pa yimti nung NSC building bushia bener oa merenshia amshi, ta Forum 18 yagi ashir.

"Police pongui kü tekolak aser teku nung atsüng aser tesülen nungi tongtiret nung metsü," ta Shreider-i National Centre for the Prevention of Torture and Other Cruel, Inhuman or Degrading Treatment or Punishment in Bishkek dangi November 2024 nung tezüluba ka agüja liasü, saka parnoki iba ken o magizük. "Ni mapa tamajung inyak ta nangzükdaktsütsü mechi parnoki küdak iron pipe agi azük."

Iba sülen secret police temi medics tem anir arua pa temang reprang aser ni parnok dang timtem aliba kecha mashi ta paper ka nung meyonngem agütsüdaktsü, ta Schreider-i ashi.

Tasüng, November 14, 2024 nü arogo züngsem ka nem pastor-i tai inyak ta tiazü nung tai tonglokdaktsütsü meranga secret police-i stun gun ka amshi. Igor Tsoy temang nung yiruba aika liaka pai meinyak aser kasa anogosa pa chiok, ta Norwegian Helsinki Committee den sendaktepa aliba Forum 18 ajanga ashi.

"Racial, ethnic, national, religious mesüra regional enmity" adokdaksü ta tai

Bishkek north tsütsü Alamudun District of Chuy Region nung Lenin yimtsüng nung arogoi amshiba ki kati anir ao. Parnoki pastor indang kinunger Pavel Yantsen meyong ki ka meita bushia liasü.

Iba sülen ketdangsür temi ano arogo züngsem toku indang ki kasa anogosa meita bushia liasü. Parnoki kaket 2,000 dak tema apu aser yangji Adventist faith ngutetsang Ellen White-i züluba kaket 200 jungnüa aser Laishiba 50 shi apu. Computers aser danga technical osetsüset, sen, mobile phones aser ki pongu indang kibur kulizüng kaket aser gari ana apu.

Mapang tatsüka lir parnoki item oset kibur nem meyipa agütsü saka mobile phone ka samaogo ta secret police-i ashi aser kaket tem ya pastor anema ken o nung kuli ama ayu.

2022 nungi ketdangsür temi ozü tekülem ki shibangtsütsü meranger aser kuli bushir, ta arogo züngsem kati Forum 18 dang ashi.

Pastor Shreider anema ken o benoka aliba ya nungya ashikülak dena lir ta arogo züngsemi ashi.

Kyrgyzstan ya United Nations Convention against Torture and Other Cruel, Inhuman or Degrading Treatment or Punishment nung meyonngem agütsüba linük ka lir.

tonglokja aliba ken o Brehostibarnü Bishkek nung aliba court ka nung jembitsü aser aitsüra pastor Shreider ya tepuokdak küm trok nungi tenet tsüngta ayutsü. Pai item taitsüba kata magizüker. Ken o ya April 17 nü nungi jembi tenzük.

"Mapa tamajung inyak ta tai tonglokja aliba nung Shreider-i shiba dak mapa tamajung inyakar shia mali, aser nisung tejangja tenük kecha amshia mali. Aser Shreider-i media, internet mesüra yimjak mesüra lenmang balala nung ozüng alema mapa inyakba kuli tejangja kecha maka," ta pastor indang okatsür Akmat Alagushev-i Forum 18 dang ashi.

Pastor Shreider jala Vera Shreider-i Brehostibarnü pa tepuokdak semdang aser pa temang junga lir aser kinunger nem chiyongtsü aser mozü bener arutsü melar ta ashi.

"Onoki ketdangsür balala dang mepishiba sülen doctor balalai pa temang tendangogo. Tepuokdak aliba chiyongtsü ya shidak dang. Pai Laishiba züngteter, koba pai pa indang cell nung yua lir, aser sarasademtsü melar," ta lai ashi.

Pastor Shreider par kidang apuba nung ketdangsür toku dena liasü ta Forum 18 ajanga bushitet. Parnok rongnung Siymik Bolotov ya NSC secret police investigator; Azim Kurmanbekov ya interior ministry senior operative aser ano Special Police Detachment nungi officers ana tejak zübanger automatic rifles bener liasü, ta jangjatet.

Parnoki ozü kishi indang door bell atem aser onoki lapokdang kübu teka alener parnok ki telungi ait aser police temi lar ki meita bushi, ta Vera Shreider-i ashi.

"Kübu ya mapa tamajung inyakar kar ama parnoki pa tekolak neme alu. Kübui onok den jembitsü parnoki memela. Ibai miim ken o ka lir ta parnoki ashi aser ozü lawyer mejadaktsütsü mechi parnoki onok indang phone ajunga meshia ayu. Parnoki onok nem parnok indang identification documents tem mereprangdaksü."

Shreider ya teka alener

ANO GO ABEN TSÜNGREM DEN

Tetsübu den ajurutepba

"Tsüngrem dak ni kü tamang yuogo, ni metsübutzü; Nisungi kü dang kechi inyaktet"
(T.Ken. 56:11).

Kodang takümüji tazüokba melilir idangji tetsübui akanga sotter. Dawid-i Saul chuba nungi atsüka senzü dang aji atalok. Saka tetsübu nungi jena aotsü melen, Tsüngrem teyari den pai tetsübu denji ajurutep. Dawidi inyakba nungjagi angazüka, aseni tajungba amshitsü akok.

Mezüngbuba, Dawidi ochishia pa tetsübu Tsüngrem dang ashi (T.Ken. 56:2). Aseni tetsübuji miimbangtsü merangra mesüra tsükchir mali ama sayura aseni takok mangutsü. Parnoki Dawid taküm arishi, pai Tsüngrem dang pa tetsübu ashi aser pa dak temulung alem.

Tetsür kati D.L. Moody dang ashi, "Kü tetsübu nung takok ngudaktsütsü teyari tekong ka ngua lir-T.Ken 56:3". Moodyi langzü, "Ni tajungba tekong ka ne nem agütsütsü-Isaia 12:2" T.Ken 56:3 nung ashir, kodang asenoki tsübur asenoki amangtsü. Isaia 12:2 jagi ashir, amangang aser tetsübu. Tamangi ajak akoker (T.Ken103:5). Asenoki ochi shia tetsübu den ajurutepdi.

Tanabuba, Dawidi tila küma pa tamang nangzük (T.Ken 56: 8-13). Pai tsükchir indang mejembi, saka Tsüngrem indang jembi. Pai Tsüngrem o nung azüit aser mechiok. Iba nungi kechi adok? Dawid sarasadem ajanga Tsüngrem tawapangba aser temoatsü bena aru (T.Ken 56:12-13).

Cuba nung AOG pastor aser pa kinungtsü pua lir



Nueva Gerona, Monupii/May 25 (Agencies): Cuba nung Assemblies of God indang pastor ana, Luis Guillermo Borjas aser pa kinungtsü Roxana Rojas nati par jabaso indang military tribunal nung tena tamangba yimsü indang jembisemba sülen tan hopta pua lir.

Prosecutors temi tena ya küm ti tashi tepuokdak yutsütsü meranger, shibai ketdangsür akumtsübo masü aser parnok ashiba manga ta ken o benoka lir.

Iba ya Nueva Gerona, Isla de la Juventud nung atalok, kong apuani ya alir, ta UK nung amenoka aliba Christian Solidarity Worldwide teloki ashi.

Tena jabaso Kevin Laureido Rojas ya military facility ka nungi jena aoba sülen tena ya military tribunal kati jaoka liasü. Kevin ya psychiatric tebilemtsü aliba mechi compulsory military service nungi medical exemption liaka pa ya tashiyim agi anir ao.

aser pa anema ken o benoka aliba ya tim masü ta ashir aser linük balala dang Cuban sorkar ajungshitsü ayongzüker.

Cuba nung tamangba yimsü temeden asoshi ozüng tesashi yanglua lir, kong Communist dictatorship ajanga religious institutions ajunga azüoker aser tekülem ki amenoktsü asoshi official registration nüngdaker. Tenüng zülüoka maliba telok tem teti ketdangsür temi tenük yoker, merenshir aser tekülem sentongtem nokdanger.

Cuba ketdangsür temi tawa ang exiled Pastor Alain Toledano Valiente ya linüki tanaben meyipa arutsü memela, shiba jala advanced breast cancer atema surgery agitsü asoshi pa arunüa liasü.

Sorkari Toledano Valiente anema travel ban agüja lir, shiba 2022 küm linük nungi odaktsü. Toledani Valiente ya unregistered Apostolic Movement nung lenir ka lir aser pai par jala mechi linüki meyipa arudakjang ta temelaba asüngdanga lir.

January ita Cuban Pastor Lorenzo Rosales Fajardo ya mass amnesty nung shilem ka ama tepuokdak nungi chioka liasü. Shiba 2021 küm peaceful protest ka nung shilem agiba asoshi küm ti tepuokdak ayutsü obendang agütsüba mapang matongdang chiok.

AO OSHI ANGAZÜKDAK:**TANÜ ANGAZÜKTSÜBA OJANG****Tenem**

(n) ali mejungketa talangka tua aliba (mountain, hill)

* Himalaya tenem nung tenem kolak 100 dak tali lir.

Tenem

(n) topur tajung ozü, tashikang aser teben sentsü temesüng nung tanak agi temdanga lir (hornbill)

*Tenem ozüi süngdong talang azük nung atemer.



Tir Yimyim

OLONG PAITEP # 7162

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Repranzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7161 TELANGZÜBA**TIPIEN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER MA

Life Insurance Corporation of India (LIC)-i ghonda 24 tsünga "life insurance policies" teimtiba ayokba atema Guinness World Record ka yanglutetba osang May 24, 2025 nü metetdaksü.

January 20, 2025 nü LIC agents 4,52,839-i India kübok tesem balala nung life insurance policies 5,88,107 tashi agüja liasü. Guinness World Records-i iba mapa kuli süogo aser alima otsü tasen ka ta sangdong.


Happy Birthday**TENÜNG - LYDIA PONGENER**

- Tasoba Anogo - 26-05-15
Küm - 10
Class - 4
School - Little Star
Talidak - Kashiram

Lydia küm 10 tashi Tsüngremi moaja taküm nungdakba ajak tajungtiba agütsü, aser timtem tetsübutsu lendong ajak nungi kümzüka anier aruba atema Teyanglur tenüng asanger.

Tang nungi tashi angaba tanur tajung Tsüngrem aküm tsübuba, ajemaluba, aser arishi talang moajang ta sarasademer.

~ Temiem, Otsu, Apa, Mummy, Oko Jilo, Molungti, Akhosa Magdeline

**Frontier highway project atema compensation mapa tenzük**

Itanagar, May 25, 2025 (Agencies): May 24, 2025 nü Arunachal Pradesh nung Frontier Highway Project aser talisa Seppa nung Lada nungi Sarli lenmang yanglutsü atema ali melen sen agütsüba maparen tenzükogo.

Iba sentong nung Union Minister for Parliamentary Affairs and Minority Affairs, Kiren Rijiju-i tongti tesemdang ka ama aden.

Kiren Rijiju-i Arunachal Pradesh nung arrtsü infrastructure renloksü atema Rs 42,000 crore investment plan tenzüksü.

Iba sentong nungsa State Minister Mama Natung (Home,

PHED, ISBA & DOIA), MLA Hayeng Mangfi (9-Chayangtajo), aser MLA Kumar Waii (8-Bameng) nunger aden.

"Ali alizükba aser temenok agütsüba mapa nung ashishitep kecha mali aser mapang telatet yur inyaker. Iba mapatong nung nübortem aser sendaktepa alirtemi amalitep aliba atema pelar aser iba ajanga mapatong tejakleni aoer" ta Deputy Commissioner Himanshu Nigam-i ashi.

Union Minister Rijiju-i Project Affected Families (PAFs) 10 nem compensation cheques agütsü.

May 26, 2025 nungi full-

scale village-wise compensation disbursement tenzüksü aser iba ajanga tangutsüpur kibong ajaki nüngdakba kulikakettem agütsüba sen ali melen temenok angutsü.

Frontier Highway ya kanga tongtipang aser iba ya talisa Arunachal Pradesh nung meta talang pilar aser arrtsülen alirtem asoshi tongtipang lir ta Rijiju-i ashi.

"Iba mapatong nung public-i akokba tashi yariteptsü ayongzüker kechiyong iba ajanga national security akangshiba dang masü saka rongsenketzüng renloksü aser tesentaktep tajungba akümtsü" ta paisha ashi.

Assam Museums aser Dibrugarh University MoU nung sign sütep

Guwahati, May 25, 2025 (Agencies): Directorate of Museums of Assam, aser Dibrugarh University tsünga May 18 nü Memorandum of Understanding (MoU) ka nung sign sütepogo.

Iba tenangzüktep ajanga heritage research, cultural preservation, aser student engagement ajungkettsü.

Dibrugarh University Vice Chancellor Jiten Hazarika lia Director of Museums, Assam Arindom Barua aser Registrar (in-charge) Dibrugarh University Prasanta Kumar Kakati nati MoU nung sign sütep.

Iba ajanga Dibrugarh University ya Northeast India nung cultural research atema

tongtipang tesem ka akümtsü nükjiding lir.

"Iba tesentaktep ajanga kaketshirtem aser tesayurtem atema heritage conservation tsütsü maongka tasen aika lapoktsür" ta Vice Chancellor Hazarika-i ashi.

Iba MoU sign sütepba atema Dibrugarh University-i "Reimagining Heritage Conservation: Innovative Strategies for Sustaining Cultural Landscapes and Narratives in Diverse Communities" ta ser anogo ananü international conference ka ayonga agiogo.

Iba sentong nung India aser tangalen nungi teshimtet nübotem aden. Parnok rongnung Thailand nungi Khon Kaen National

Museum-Laxaman Boomreng aser Korakech Panich na aden.

Maneni, Historical and Antiquarian Studies, Assam Director Sangeeta Gogoi, Dibrugarh University Assamese and Anthropology departments nungi Bhagyashree Sharma aser Gitanjali Devi, District Museum Officer, Dibrugarh Bijoylakshmi Borah aser District Museum Officer, Barpeta Mridusmita Kalita nunger aden.

MoU sign sütepba sülen Dibrugarh University-i Directorate of Museums den yaritepa kaketshirtem asoshi digitisation initiatives, research collaborations, aser internship opportunities agütsü sentong lir.

NEHU tebilemtsü atema Mukul Sangma-i sorkar aitsür

Guwahati, May 25, 2025 (Agencies): Meghalaya state sorkari North Eastern Hill University (NEHU) tebilemtsü mekottetba atema aitsür ta Meghalaya opposition lennir Mukul Sangma-i ashi.

NEHU khuret angatetteptsü atema mapa inyakba majiteter aser iba ajanga Meghalaya higher education nung kanga mejungi kongshir, ta Mukul-i ashi.

Iba tebilemtsü ya adoker ita aika süia arur aser sorkari iba atema inyaksüla. State aser Centre sorkartemi university tenüng menük bener asoshi telemtetba tajung ka agütsüla ta paisha metetdaksü.

Meghalaya state sorkari NEHU ya central university ka lir ta shia mapa inyaksü mesademba indang shia arur.

Iba tebilemtsü khuret atema tawa tu Ministry of Education, Additional Secretary Sunil Kumar Barnwal aser Director of Higher Education Subrat Kumar Pradhan nati NEHU Shillong campus semdangogo.

Tenati NEHU nung tensa süngjemdaksütsü atema faculty members, deans, aser heads of departments den sendentem amen.

NEHU Students' Union (NEHUSU)-i Vice Chancellor

Prabha Shankar Shukla mapa nungi anentsütsü takhangba agüjaka Barnwal aser Pradhan nati ken o angatetteptsü merandanga liasü.

"Sorkari lapokba company tem nung mapa balala tangar nem agütsüba magizüker" ta Mukul Sangma-isa ashi.

"Shillong Smart City Ltd tentetba nung tebilemtsü abener kechiyong smart city projects inyaksü atema tangalen nungi nisungtem nem mapa lemozükja lir" ta pai ashi.

Chief Minister-i social media nung asayar kar cricket kits lema agütsübaji "stunt" ka liasü ta Mukul-isa lutsüogo.



OFFICE OF THE CHANGTONGYA KAKETSHIR TELUNGJEM

TENÜNGSANG AGÜTSÜR



Mr. P. Senti Longkumer aser Mrs Y. Helen Aier na jabaso **Mr. Moasunep-i** Khelo India Youth Games 2025, Bihar nung 4th -15th May 2025 anogotem nung Volleyball Technical Official ka ama shilem agia liasü. Iba jenjang tulu tongtetba asoshi Changtongya Kaketshir Telungjem ajanga pa nem tenüngsang agütsür.

Tsüngremi ne taküm aser ne wadang nung maneni moajangma.

Sdl/-
Sb. Arensashi
President CKT

Sdl/-
Kr.Sashilemla
General Secretary CKT

Malaysia-i Myanmar nung ceasefire atsülangdaksüner

Kuala Lumpur, Monupii/ May 25 (Agencies): Myanmar nung menoknok lendong tulu atalokba sülen ceasefire benokba koba May ita tembangtsü lir iba ya Malaysia-i maneni atsülangdaksüner.

Ceasefire benoker liaka telok balala tsüngda maneni raraba ajanga iba jenjang agiba tajangzük indang ashishia arudar.

Malaysia indang Foreign Minister Mohamad Hasan-i,

Deobarnü Kuala Lumpur nung Association of Southeast Asian Nations (ASEAN) foreign minister tem senden amenba mapang iba tayongzükba agüja liasü. ASEAN linük lenirtem senden mamen tsüngda anogo ka jelia Foreign Minister tem senden menogo.

2021 küm Myanmar nung military-i Aung San Suu Kyi-i aniba civilian sorkar atsüngtokba sülen linük nung mepetmesü tulu adokba ya

ASEAN-i bentettsütsü atema inyakdar saka tang tashi nung takok ngua mali.

2021 küm April ita linük nung yimjung bener arutsü atema onok pongu benokba Myanmar-i tashi anga manidakba sülen ASEAN-i coup lenirtem parnok senden nung adentsü memelai arudar.

"Onoko Myanmar nung stakeholders tem dang, linük raksar aliba yanglushitsü atema lenmang tasak aliba atema lenmang sadema lapoktsütsü aser Myanmar nungertem timtem tekangshi nungi anitettsü atema rarabangsen aser azütokshi lendong anena ceasefire benoka aliba atsülangshitsü ayongzük," ta Mohamad-i ashi.

Paisa, ceasefire koba dang benoka ali iba ya atakzük aliba mapang dang nungi taliba atsülanga aotsü benokdanga liasü.

Malaysia ya tang ASEAN indang mendenbuba lir.

Mohamad-i taoba mapang ashiba agi, Myanmar nung tebilemtsü ya arrtsü adena prokshia oa refugee tem timba kidanger ASEAN linüktemi jenshia aoba, aser iba den arrtsü adena ozüng alema inyakba maparen tali akümbe sülen iba tebilemtsü ya bentettsü atema iba telok yagi merangdangogo.

Malaysia-i tang azütokshiba tajemba kümdaktsütsü aser humanitarian teyari tali agütsütsü asoshi rangloker inyakdar, saka pai ashiba agi, telok balala tsüngda yimden yimsüsüba dak sendakba nung sensaksem asoshi sentong aliba ya temela masütsü kechiyong temulung melemtep tali kümogo.

Taküm March ita menoknok tesashi ka anoka nisung 3,800 shi asüba den nisung meyirejang aika talidak makai akümbe sülen Senior General Min Aung Hlaing-i aniba military sorkari parnok rara aliba telok balala den ceasefire ka benoka liasü.

Ceasefire ya taoba mapanga atsülangogo, ajisüaka conflict monitor temi ashiba agi, rara manen kong military sorkari anüng ajanga tesem balala amakba densema liasü.

April ita Malaysia Ato Kilonser Anwar Ibrahim-i Min Aung Hlaing den Bangkok nung ajurutepba pa dang ceasefire benoka aliba akümbsütsü mepeshia liasü.

Anwar-i ashiba agi, senden amenba sülen ASEAN-i ken o süoki ia agiba lemsatepogo aser kecha tebandang aser tetsükdaktsü makai election agitsü atema tanem tanemi jenjang yanglutsü tejangraba aliba lemastepogo, koba ken o asadangertemi ashiba agi temela masütsü, mesüra tamakoktsüang asütsü.

(Maneni tapak 8 nung...)

SÜR KÜM 25 AJUNGBA ANOGOMUNG



Teti meima aliba Asür Pangikala Pongen (Mopungchuket)
(20/5/1909 - 26/5/2000)

Tanü onoki teti meima aliba 'Mamala'/'Otsü' kanga menungra bilemteter, la indang temeim aser lai sayuba onok mulungjang nung lir. Akhum agüja onoki la tongmelang takum indang tatsü agi lemsateper.

Lolentsüngba & Nokchirala na jala, Pangikala tebu ya Aor tem rongnung Government Primary Teacher mezüngbuba (1903-1923) liasü. La Impur Mission School nung Class VI (1924-29) tashi azüng aser Calss VIII ya Mission High School, Nagaon nung renem aser Mission Teacher Training Institute (1930-32) nung Professional Course ka agia liasü.

La takum alidang takok anguba aser shilem agibatem:

- * Tamalen la azüngdak Impur Mission School nung tesayur ka ama inyak (1933-39).
- * La kinungbo Longrimendang (Mopungchuket village) den külemi Sir Charles Pausey (then DC of Naga Hills) ajanga nungloksüba ama Satakha (Zunheboto) nung school ya reprangshima upgrade asü, kong tena ka Asst. Teacher aser ka Headmaster (1944-46) inyaka liasü.
- * Girls Hostel, Government High School, Mokokchung nung Warden shim (1947-66), aser iba sülen kasa school nung Asst. Teacher shim (1967-77). Laisa hostel nung alirtem asoshi World Wide Guild anir tenzük, koba tetsürtem Khristanpur yimya nung anitettsü asoshi tenzüka liasü.
- * Teachers Colony nung tanurtem asoshi tuition classes tenzük, koba mapang tatsüka lir Ao Meduim Primary School akum (tang GMS Pongentola, Aongza Ward nung lir).
- * Lady Earl Duplex (1932) kübok Certificate of Honor in Advance Course in Needle Work sempet angu aser 1932 nung Nagaon nung aliba Red Cross Organization of the British Empire kübok Junior Course in First Aid nung pass asü.



- * India Sunday School Union (ISSU) kübok 1932 küm All India Scripture Examination ajangeta Impur aser Mokokchung nung küm aika Sunday School tesayur inyaksü temsüa akum.
- * Impur nung American Missionary Anderson-i mepishiba ama Nagaland nung osangkaket tambusang Ao Milen asoshi 1936-37 mapang Indigenous Bamboo Torch (Milenbong) Logo yanglu.
- * Ao Kaketshir Mungdang ajanga asüngdangba ama arok Ao Süpeti (Züngjiang Sü) desogn asü, koba mapang tatsüka lir yanglushia Ao tsür ajungai kin kidong telemsa makai tanüa agir. Ano lai adakba süpeti ka (Tenük Sü) ya 1950s mapang kasa ASC ajanga Guwahati nung aliba Assam State Museum-i bener ao.
- * Impur nung aliba American Women Missionay kübok Organist ka akum, anungji Mokokchung Town Baptist Arogo (1960-70) mapang iba congregation anir mezüngbuba akum. Iba tenüng nung Pangikala Music Award ya tenteta 2013 nungi MTBA Annual Youth Meet mapang agütsür.

Tsüngremi Pa sempet, shisatsü aser tashi jungkai adoka sayutsü asoshi la shimtetba asoshi Kibuba tenüng asanger.

LAI YUTSÜR OGO - LA MAPATEM TETI ALIR

- * Arogotsür Mungdang (Ao Church Women Conference) ayongzükba nung shilem tulu agi aser 1950-70 mapang Mokokchung Town Baptist Church (Women) indang Finance Secretary aser Secretary inyak. Child Evangelism aser Sunday School nunga Board Member ka liasü.



- * Women Welfare, Mokokchung nung Vice Chairperson ka ama 1951-88 mapang kümsük aika tenzüka liasü.
- * 'Nagaland For Christ' omen nung ajemdaker wako ka design süa ar, koba Ao Churches tenüng nung Rev. Kijung-i American Baptist Church nem agütsü.
- * New Delhi nung Republic Day Parade (1966) mapang Nagaland tenüng nung shilem agiba tetsürtem rongnung ka liasü aser kasa sentong nung President of India (1978) indang Invitee ka liasü.
- * Mokokchung nung All India Handicraft Week mapang shilem agi aser Art work categories balala pongu kübok 1st prize ngua Champions sempet agütsü.
- * 1932 nung la indang paintings kar Department of Art and Culture, Nagaland ajanga 1997 küm Delhi nung National Trade Fair alidang sayu aser Kohima nunga May 2006 nung Indian National Trust for Art and Culture Heritage (INTACH), New Delhi kübok sayua liasü.
- * Lai State tenzükba temaitsü Nagaland State Inaugural Medal agütsü.
- * Ao Baptist Arogotsür Mungdang ajanga Silver Jubilee mapang lai tenzükba (1947-65) temaitsü Certificate of Appreciation agüja liasü.
- * Watsü Mungdang ajanga 2007 küm mezüngbuba Artist asoshi Commendation Award agütsü.
- * La indang Art work 30 dak tema wazüka yua lir. Akhum agüja Ao Milen ajanga la nem 'Mamatetba Tesayur' (Unforgettable Teacher), (5th September, 2000) nungja agütsü; Ao Kaketshir Mungdang ajanga 'Tesangwa Tetsü' (Mother of Light), aser Dr. S.C. Jamir-i la nem 'Legend' narokum agütsü.



Ancelotti melena Alonso Real Madrid manager kümogo



Xabi Alonso

Monupii/May 25, 2025 (Agencies): Real Madrid-i taoba mapang club nungi midfield asayar Xabi Alonso club indang manager asütsü shimogo. Pa den küm asem atema tenangzüktepba yangluogo.

Alonso shiba asaya aliba mapang Real Madrid nungi 236 ben asayaogo, pai iba ita tetenzüklen season tembangba sülen Bayer Leverkusen toktsütsü ta shir liasü.

Toba mapang Liverpool aser Spain midfielder Alonso, shibai 2028 küm June 30 nü tashi atema tenangzüktepba ka yangluogo, pai Carlo Ancelotti melentsü.

Italy nunger coach Ancelotti

lenisüba nung Real pur Honibarnü tatemangbuba asaya asayaogo aser pa Brazil national team coach akümtsü.

Alonso shibai asayar ka ama 2014 küm Real nungi Champions League koka liasü, pa Hombarnü Real Madrid indang training ground nung manager ama metetpelatsü aser pa lenisüba nung Real pur Club World Cup asayatsü. Parnok mezümbuba asaya Saudi Arabia club Al-Hilal den June 18 nü asayatsü.

Iba ita tetenzüklen Ancelotti-i, Alonso ya alima nung coach tajungtiba rongnung ka ta ashi.

Arishi küm 43 tain coach lenisüba nung Leverkusen puri 2023-24 campaign nung

mezümbuba Bundesliga title bena liasü. Iba küm parnok asaya ka nung danga tamakok mangu. Parnokisa German Cup dena koka liasü.

Ajisüaka Leverkusen puri takümba Bundesliga mekokter aser parnok Bayern Munich sülen tanabuba jenjang nung tembanga liasü.

Leverkusen nung taoba Manchester United coach Erik ten Hag-i Alonso melentsü atema tenangzüktepba ka yanglutsü ana nung lir.

Alonso asaya aliba mapang 2010 küm World Cup kokogo aser pa coach ka ama mezümbuba 2018 küm Madrid indang under-14 team coach inyaka liasü.

Real Sociedad' indang B team küm asem tashi kanga takok ngua aniba sülen pa 2022 küm October ita Bayer Leverkusen coach kuma first-team coach mapa mezümbuba agizüka liasü.

Pai club ya bonglanglen tanabuba jenjang nung aliba nungi trokbuba tashi ani aser taruba season Bundesliga dena koka liasü.

Durand Cup 2025 state pongu nung asayatsü

Monupii/May 25, 2025 (Agencies): Asia nung football asayamung tejentiba Durand Cup ya asaya tenzükler taküm 134benbuba asayatsü lir, aser taküm mezümbuba Manipur yimtiba Imphal densema state pongu nung asayatsü lir.

Durand Cup Organising Committee-isa taküm iba asayamung ya June 22 nungi August 23 tashi asayatsü ta sangdongogo.

Assam kübok Kokrajhar nung taküm agi küm asem buba atonga iba asayamung asayatsü aser Jharkhand kübok Jamshedpur aser Meghalaya yimtiba Shillong nunga asayatsü. Küm 100 dak tema asaya aruba asayamung ya 2019 küm nungi West Bengal yimtiba Kolkata nung asaya arudar aser kasa tesem nung

iba asayamung küm trokbuba atonga asayatsü lir.

Iba asayamung ya Delhi nung amendaker asaya aliba anütokleni belener aruba sülen linük nung asayamung tongtibang ka kümogo, koba team 16 asaya aliba nung team 24 asayar aser Indian Super League (ISL) team tem ajaki shilem agir.

Asayamung koba Services asem tenung nung Indian Army Eastern Command-i ayongzüka asayar, iba asayamung ya balaka lir, kong Services team tem India nung football club tajungtibatem den tokteper aser taoba asayamung ana tashi nung kidanger linük tem nungia Army team temi arua shilem agiogo.

India Army-i iba asayamung ya linük anütoklen

aser North-East ajunga nung atsülanga aotsü nükjidong aliba ya taküm asaya ayongzüka asayatsü atema yimtitem shimba ajanga sayur.

Ajak senteper iba asayamung ya tesem trok nung asayatsü kong Kolkata nung tesem ana (Vivekananda Yuba Bharati Krirangan aser Kishore Bharti Krirangan) Imphal (Khuman Lampak stadium), Ranchi (Morhabadi Stadium) mesüra Jamshedpur (JRD Tata Sports Complex), Shillong (Jawahar Lal Nehru Stadium) aser Kokrajhar (SAI Stadium) densema lir.

Iba asayamung tesüsabuba North East United FC-i koka lir. Taoba küm final asaya nung parnoki Mohun Bagan Super Giant koka club tenteter mezümbuba asayamung koka liasü.

French Open: Sabelenka tanabuba round-i iogo

Monupii/May 25, 2025 (Agencies): Tetsürtem rongnungi world number one asayar Aryna Sabalenka-i taküm French Open asayamung kanga junga tenzüka Deobarnü mezümbuba round nung Russia tsür Kamilla Rakhimova kokogo. Lai iba asayamung ya tang tashi nung khen danga koka mali.

Sabalenka-i iba asaya akoktsü atema ghonda kata magi aser lai asayamung tenzüka nü Court Philippe Chatrier nung Russia tsürla ya 6-1, 6-0 agi ayong ayonga koka liasü.

Sabalenka, shiba Roland

Garros nung khen danga final tonga asaya mali, lai iba asayamung nung tajungtiba asayabji 2023 küm semifinal tonga asayaba ya liasü, aser takümba tajungba asayatetsü imlaa asayamung tenzüko.

Grand Slam asemben tashi koker alila yagi Australian Open anaben aser US Open khen ta koka lir.

Lai taküm Australian Open asembenbuba akoktsü maongka liasü saka final nung lai America tsür Madison Keys mekokteti liasü, ajisüaka iba tezüdang ya toktsür taküm France nung mezümbuba title abentsü asoshi merangtsü

imlar.

"Ni idakji junga asayatetsü ta bilemer," ta Sabalenka-i Rakhimova akokba sülen ashi. Iba asaya ya arishi küm 27 tain Belarus tsürla yagi amokbanger asaya aser lai winner 30 ngua liasü.

Sabalenka taruba round nung Switzerland tsür Jil Teichmann mesüra Italy tsür qualifier Lucrezia Stefanini den asayatsü.

Kasa asayamung tetsür kija asaya nung China tsür Zheng Qinwen-i mezümbuba round nung 6-4, 6-3 agi Anastasia Pavlyuchenkova koka tanabuba round tongtetogo.

INDIA OSANG :

Tapak 3 nungi...

Gujarat nung menden 2 atema by-polls...

Congress pur menden anaprongla nung tokteptsü telemtetba agiogo. Parnok Indian National Developmental Inclusive Alliance (INDIA) partner AAP den longjemer metokteptsü.

Gujarat Congress otongdar Manish Doshi-i ashiba agi, INDIA bloc ya national jenjang nung lir aser Gujarat nungbo kecha tesendaktep mali.

Congress-i Deobarnü Gujarat nungi Lok Sabha züngsem Geniben Thakor,

Jignesh Mevani, Kirit Patel, aser Raghu Desai nunger Kadi by-poll incharge asütsü shimogo. Kasa mapang nung Paresh Dhanani, Punjabhai Vansh, Indranil Rajyaguru, aser Vasram Sagathiya nungeri Visavadar menden atema by-poll achaayangtsü.

Gujarat assembly nung tang BJP pur menden 161, Congress 12 lir aser AAP, Samajwadi Party, aser Independent temi tanungba mendentem atsünger lir.

Lalu Yadav-i par jabaso Tej Pratap RJD...



Tej Pratap Yadav

Post koba delete süatokogo, iba post nung Tej Pratap Yadav ya tetsür ka den tangoker aliba noksa ka liasü aser noksa den külemi tena küm 12 tashi kazüa arudar, ta zülutsür liasü.

Iba post ya social media nung ayimsünga prokshiba

sülen social media amshirtem aikati arishi küm 37 tain Yadav ya taoba Bihar chief minister Daroga Rai'er semchir Aishwarya Rai den 2018 küm kibong kümogo, ta metetdakja liasü.

Ajisüaka Aishwarya-i la kinungboer kinungertemi la mezügmeshia amshir ta shia ki toktsür aoba sülen tena kibong akümba ya mepetmesü nung tembang.

Ken o dak sendakba nung Tej Pratap Yadav-i X ajanga, iba ya pa aser par kibong tenung menüktsütsü atema merangdangba ka lir, ta ashi. Pai ashiba agi, pa indang social media accounts hake asü aser pa indang noksa edited sür inokja liasü.

BENDANGLI OSANG : Tapak 7 nungi...

Malaysia-i Myanmar nung ceasefire...

Mapang talang ka nungi benschia aruba ASEAN indang policy ka lir aser aji züngsemtem indang domestic ken o nung mejushitsü asoshi lir. Iba ajanga mangatettep aliba bentettsü atema teyari magütsüteti arudar.

United Nations aser independent conflict monitor temi ashiba agi, ceasefire benoker liaka military sorkari anüng ajanga tesem balala maneni makdar.

Tenük kuli agütsürtemi ashiba agi, May tom nung menoknok anokba epicenter anasa Sagaing tesem nung anüng ajanga school ka amakba sülen tanur 20 densem nisung 22 tepseta liasü.

Coup anemba telok aser kin balala telungpur teloktemi rara anentsü atema tenangzüka balala agütsüogo.

Ajisüaka Myanmar anütoklen alirtemi ashiba agi, coup anema nokdakba teloktemi military-i atsünger

aliba jila balala aser kidanger linük Thailand den shishilembaba lenmangtem tsüngba ajanga mangatettep adokba sülen parnok jenshia aotsüsa kümogo.

Myanmar indang military sorkari taküm küm tatemlen election ayongzüka agitsü sentong aliba lemsatepogo.

Ajisüaka opposition "National Unity Government"-i nüburtem aser political party tem dang military sorkari ayongzüka election nung shilem magitsü ayongzüko.

Myanmar nung military-i sorkar atsüngba sülen iba anema nüburtemi longkak ait tenzüker aser military-i item nüburtem tashiyim agi azüokba sülen nisung meyrejang aika tepsetogo aser iba den Aung San Suu Kyi densema lenirtem, activist tem aser military sorkar anemertem aika tepuokdaki yokogo. Lenirtem karbo taküm tepeyong tepuokdak ayutsü obendang agütsüogo.

BILEMDANGANG

"Tajung majung ajak ajangshia aoba dang taküm ta ajar."